

REGULAMENTO DO RÉXIME INTERNO DO CONSELLO DE CAMPUS DE PONTEVEDRA

TÍTULO PRELIMINAR

Art.1. O Consello de Campus de Pontevedra rexerá o seu funcionamento interno dentro do marco sinalado pola L.O.U., os Estatutos da Universidade de Vigo e o presente Regulamento.

2. A normativa estatal básica sobre o Procedemento Administrativo Común en materia de funcionamento dos órganos colegiados será supletoria en todos aqueles aspectos non previstos nos Estatutos da Universidade de Vigo nin neste Regulamento.

Art.2. O funcionamento do Consello estará ordenado polos principios de toma de decisións por maioría e respecto ás minorías.

Art.3. O Consello, vencellado á realidade cultural, social e económica do seu contorno, atenderá os intereses da comunidade universitaria do Campus Universitario de Pontevedra, así como potenciará as relacións con outros sectores e institucións representativas da sociedade.

Art.4. O Consello promoverá o uso do galego e empregará preferentemente a lingua galega en tódalas manifestacións oficiais.

TÍTULO I. DO CONSELLO DE CAMPUS.

Art.5. O Consello de Campus é o órgano colegiado de representación e de coordinación do campus.

Art.6. O Consello de Campus ten a seguinte composición:

- a) O presidente, que será o Reitor da Universidade.
- b) Un Vicerreitor que, de existir, sería o Vicerreitor do Campus de Pontevedra.
- c) Todos os decanos ou directores dos centros do campus.
- d) 5 profesores, elixidos por e entre os claustrais do mesmo sector e campus, dos que polo menos 1 non sexa funcionario. Garantirase que haxa polo menos 1 representante de cada ámbito científico presente no campus, no caso de que haxa candidatos.
- e) 5 estudantes, elixidos por e entre claustrais do mesmo sector e campus, entre os que haberá polo menos 1 por cada ámbito científico presente no campus, no caso de que haxa candidatos.
- f) Os 2 membros do persoal de administración e servizos do campus máis votados nas eleccións ao Claustro no campus correspondente.

O secretario será nomeado polo presidente de entre os membros do consello con dedicación a tempo completo.

Art.7.

1. Todos os membros do Consello de Campus, agás os que o sexan por razón do seu cargo, serán elixidos polo período para o que teñan sido elixidos como representantes no Claustro da Universidade de Vigo.
2. Perderase a condición de membro do Consello de Campus por finalización legal do período para o que foi elidido, por dimisión, por perda da condición da elixibilidade ou por causa legal sobrevida. A condición de elixibilidade entenderase en todo caso ligada á pretensa ó sector polo que foi elidido. Cando o membro cesante non o sexa pola súa condición de Decano ou Director dun dos Centros do campus, será substituído polo seguinte máis votado; de non haber posibles substitutos, convocaranse eleccións nun prazo de sete días, para cubrir esa vacante.
3. O membro do Consello de Campus que estea en situación de comisión de servizos, servizos especiais, excedencias por coidado de familiares e permisos ou licencias, será substituído temporalmente polo primeiro suplente unha vez transcurrido un ano nesa situación, ou con anterioridade se o solicita o propio interesado. Recuperará a condición de membro do Consello de Campus no momento da súa reincorporación, perdendo a devandita condición o seu substituto.

Art.8. Son funcións do Consello de Campus:

- a) Proposición ao órgano competente de implantación de novas titulacións no seu ámbito territorial.
- b) Promoción da consecución de edificios e terreos para desenvolver o labor docente e investigador.
- c) Promoción da descentralización dos servizos.
- d) Participación na elaboración das políticas académicas específicas do campus.
- e) Atender á creación e correcto funcionamento dos servizos xerais do campus, así como verificar a calidade dos servizos que sexan competencia doutras institucións públicas.
- f) Fomento das relacións intitucionais con organismos locais e provinciais, así como da proxección da universidade no seu contorno.
- g) Todas as competencias que lle sexan delegadas polo Consello de Goberno.
- h) Nomeamento de comisións que considere convenientes para exercer mellor as súas funcións.
- i) Todas as demais competencias que estes Estatutos e os resulamentos desta universidade lle confiran.

Art.9.

1. O Consello de Campus poderase reunir con carácter ordinario ou extraordinario.
2. O Consello de Campus reunirase durante o período lectivo alomenos unha vez ó trimestre con carácter ordinario, e con carácter extraordinario a iniciativa de:
 - a) Presidente ou Vicerreitor correspondente mediante delegación.
 - b) Cando o solicite o 25% dos membros do Consello.
3. A instancia para a convocatoria dunha reunión extraordinaria do Consello de Campus dirixirase por escrito ó Presidente, coas firmas corespondentes e coa proposta dunha orde do día determinada. O Presidente está obrigado a

convocar o Consello para unha data non posterior ós 10 días hábiles contados dende a entrada da solicitude no Rexistro do Campus.

Art.10.

1. Na convocatoria do Consello de Campus deberá constar a orde do día, a data, a hora e o lugar da reunión. A convocatoria deberá ser entregada, alomenos, con 72 horas de antelación, agás no caso de convocatoria extraordinaria, que será de 48 horas. Achegarase á convocatoria copia da acta ou actas das sesións anteriores, pendentes de aprobación.
2. Para que a convocatoria produza efecto deberase poñer en coñecemento de todos os seus membros mediante notificación entregada no lugar onde cada quen desenvolva o seu traballo, e, no cado do alumnado, nos locais asignados para os seus representantes nos distintos centros, durante os períodos que non haxa docencia, nos seus domicilios particulares por correo certificado.
3. Na orde do día das convocatorias ordinarias do Consello de Campus, figurarán inexcusablemente as mencións de aprobación da acta da sesión anterior e das sesións extraordinarias que se tivesen celebrado, o informe do Presidente e rogos e preguntas.
4. O Presidente elaborará a orde do día de cada sesión. O Presidente incluírá na orde do día da seguinte reunión do Consello calquera asunto do que a súa inclusión sexa solicitada por escrito por, alomenos, o 10% dos seus membros. Na solicitude deberase incluír a relación de asuntos a tratar que deberán ser o suficientemente explícitos e claros para que se coñeza exactamente o seu contido.

Art. 11.

1. O Secretario levantará acta de tódalas sesións. Caso de que non puidese asistir, o Presidente designará quen faga as súas veces.
2. Na acta deberanse incluír os textos literais dos acordos e un resumo dos debates coas diferentes posicións, así como calquera mención que os membros da Xunta, individual ou colectivamente, desexen que figuren expresamente.
3. Cada acta será asinada polo Secretario, ou quen faga as súas veces, co visto e prace do Presidente da sesión que se reflicte.
4. As actas aprobaranse na sesión seguinte ordinaria do Consello de Campus, incorporando as modificacións que resulten aprobadas.

Art. 12.

1. No Consello de Campus levarase un libro de actas no que se transcribirán os acordos e debates habidos en cada sesión, unha vez aprobados.
2. O libro de actas estará baixo a custodia do Secretario do Consello, que permitirá que calquera membro do Consello o consulte. Así mesmo, custodiará a documentación achegada ó Consello, e informará da mesma ós seus membros.
3. Só darán fe dos acordos e recomendacións do Consello as certificacións expedidas polo Secretario.

4. As certificacións poderanse expedir:
 - a) De oficio, por requirimento de órganos das Administracións Públicas, incluída a propia Universidade de Vigo, ou de órganos xudiciais no exercicio da súa competencia.
 - b) A instancia dos membros do Consello de Campus.
 - c) A instancia de calquera interesado.Nestes dous últimos casos, o contido das certificacións versará só sobre a parte decisoria dos acordos ou recomendacións.

Art. 13.

1. O Consello de Campus entenderase constituído en primeira convocatoria coa asistencia da maioría absoluta dos seus membros con dereito a voto.
2. De non acadar esta asistencia, constituirase en segunda convocatoria transcurrida media hora, de contar coa presenza da terceira parte dos seus membros.
3. Transcorrido $\frac{1}{4}$ de hora, de non acadar o quórum preciso para a segunda convocatoria, procederase a convocala para outro día.

Art. 14.

1. O Consello de Campus será presidido polo Reitor ou polo Vicerreitor no que delegue, asistido polo secretario.
2. O Presidente dirixe e ordena o desenvolvemento dos debates. Fixará, se o considerase preciso, un tempo de debate para cada tema, e en función do pedimento de intervención, determinarase a duración de cada intervención.
3. No caso de que a maioría simple dos membros do Consello considerasen que un tema non queda suficientemente debatido, poderá solicitar á Presidencia un novo prazo de debate, que se desenvolverá dacordo co establecido no punto anterior.

Art. 15.

1. Os acordos do Consello de Campus adoptaranse por asentimento, ou en votación por maioría simple dos asistentes.
2. Non se poderán adoptar acordos se no momento da votación non estivesen presentes alomenos $\frac{1}{3}$ dos membros do Consello.
3. No caso de existir máis de dúas propostas sen que ningunha delas acade a maioría, procederase a realizar unha segunda votación entre as dúas máis votadas.
4. Non se admite a delegación de voto nin o voto anticipado.
5. Non poderá ser obxecto de acordo ningún asunto que non figure na orde do día, salvo que estean presentes tódolos membros do Consello e sexa declarada a urxencia do asunto polo voto favorable da maioría.

Art. 16. As votacións efectuaranse polo sistema de man ergueita, serán secretas cando o solicite un membro do Consello ou afecte a persoas concretas.

Art. 17.

1. As sesións do Consello de Campus serán públicas. Calquera membro da comunidade universitaria poderá solicitar asistir a elas sen voz e sen voto, de acordo co aforo do local.

2. Poderán ser invitados ás sesións do Consello de Campus, con voz pero sen voto, todos aqueles membros da comunidade universitaria que estean interesados en asuntos específicos e que poidan resultar afectados polos mesmos.
3. Ás sesións do Consello poderán asistir persoas invitadas, a proposta do Presidente ou do Consello, para informar sobre algún punto da orde do día, con voz e sen voto.

TÍTULO II. DAS COMISIÓNS DELEGADAS

Art. 18. O Consello de Campus poderá crear Comisións Delegadas para estudar aqueles temas que lle encargue o Consello, informando ó mesmo dos seus traballos e resolucións.

Art. 19. A composición das Comisións, e o seu funcionamento, serán establecidas polo pleno.

TÍTULO III. DA REFORMA DO REGULAMENTO

Art. 20. A iniciativa para a reforma deste Regulamento pode ser adoptada polo Presidente ou mediante proposta asinada por $\frac{1}{4}$ dos membros do Consello.

Art. 21. As propostas de reforma do Regulamento deberán estar debidamente artilladas e motivadas, e serán debatidas, á súa conveniencia, polo pleno en sesión extraordinaria. En caso de considerarse axeitadas, abrirase un prazo de presentación de emendas e alegacións. A reforma do Regulamento requerirá a aprobación por maioría absoluta do Consello de Campus.

Art. 22. De non resultar aprobada a proposta de reforma considerarase rexeitada, e non se poderá propor idéntica reforma ata transcurrido un prazo dun ano.

DISPOSICIÓN FINAL

Este Regulamento entrará en vigor ó día seguinte á súa aprobación.

Dilixencia para facer constar que o presente Regulamento de Réxime Interno do Consello de Campus foi aprobado polo Consello de Campus de Pontevedra, en sesión ordinaria celebrada o día 15 de maio de 2007.

A Secretaria do Consello de Campus

María del Pilar García Soidán